

玉茗堂全集

玉茗堂全集

臨川義仍湯顯祖著

題詞

旗亭記題詞

予讀小史氏宋靖康間董元卿事伉儷之義甚  
奇元卿能不忘其君隱於仇離某氏能歸其夫  
且自歸也最所奇者以豪鷲之兄而一女子能

再用之以濟却金示衣轉變輕微立俠節於閭  
閻嫌疑之間完大義於山河亂絕之際其事可  
歌可舞常以語好事者而友人鄭君豹先遂以  
浹日成之其詞南北交叅才情竝越千秋之下  
某氏一戎馬間婦人時勃勃有生氣亦詞人之  
筆機也嗟夫董生得反南冠矣獨恨在宋無所  
短長於時有以自見使某氏之俠烈不獲登於

正史而芻落於傳奇雖然世之男子不能如奇  
婦人者亦何止一董元卿也

玉合記題詞

余往春客宛陵殊闕如邛之遇猶憶水西官柳  
蘇蘇可人時送我者姜令沈君與梅生禹金賓  
從十數人去今十年矣八月太常齋出宛然梅  
生造焉爲問故所遊長者俱銷亡在者亦多流

泊余泫然久之爲問水西官柳生曰所謂縱使  
君來不堪折也因出其所爲章臺柳記若干章  
示余曰人生若朝暮聚散喧悲常雜其半奈何  
忘鼓缶之驩闕遇旬之宴乎予觀其詞視予所  
爲霍小玉傳並其沉麗之思減其穠長之累且  
予曲中乃有譏托爲部長吏抑止不行多半韓  
新王傳中矣梅生傳事而止足傳於時第予昔

時一曲纔就輒爲玉雲生夜舞朝歌而去生故  
修竊其音若絲遼徹青雲莫不言好觀者萬人  
乃至九紫君之酬對悍捷雲昌子之供頓清饒  
各極一時之致也梅生工曲獨不獲此二三君  
相爲賞度增其華暢耳九紫玉雲先嘗題書問  
梅生梅生因問三君者一來遊江東乎予曰自  
我來斯風流頓盡玉雲生容華亦長矣嗟夫事

如章臺柳者可勝道哉爲之倚風增歎

牡丹亭記題詞

天下女子有情寧有如杜麗娘者乎夢其人卽  
病病卽彌連至手畫形容傳於世而後死死三  
年矣復能溟漠中求得其所夢者而生如麗娘  
者乃可謂之有情人耳情不知所起一往而深  
生者可以死死可以生生而不可與死死而不

可復生者皆非情之至也夢中之情何必非真  
天下豈少夢中之人耶必因薦枕而成親待掛  
冠而爲密者皆形骸之論也傳杜太守事者彷彿  
晉武都守李仲文廣州守馮孝將見女事予  
稍爲更而演之至於杜守收考柳生亦如漢睢  
陽王收考談生也嗟夫人世之事非人世所可  
盡自非通人恒以理相格耳第云理之所必無



安知情之所必有邪

邯鄲夢記題詞

士方窮苦無聊倏然而與語出將入相之事未  
嘗不憮然太息庶幾一遇之也及夫身都將相  
飽厭濃醒之奉迫束形勢之務倏然而語以神  
仙之道清微閒曠又未嘗不欣然而歎悄然若  
有遺暫若清泉之活其目而涼風之拂其軀也

又况乎有不意之憂難言之事者乎回首神仙  
蓋亦英雄之大致矣邯鄲夢記盧生遇仙旅舍  
授枕而得婦遇主因入以開元時人物事勢通  
潛於陝拓地於番讒構而流讒亡而相於中寵  
辱得喪生死之情甚具大率推廣焦湖祝枕事  
爲之耳世傳李鄴侯泌作不可知然史傳泌少  
好神仙之學不屑昏宦爲世主所強頗有幹濟

之業觀察郊號鑿山開道至三門集以便餉漕  
又數經理吐番西事元載疾其寵天子至不能  
庇之爲匿泌於魏少遊所載誅召泌懶殘所謂  
勿多言領取十年宰相是也枕中所記殆泌自  
謂乎唐人高泌於魯連范蠡非止其功亦有其  
意焉獨歎枕中生於世法影中沈酣吟嚙以至  
於死一哭而醒夢死可醒真死何及或曰按記

則邊功河功蓋古今取奇之二竅矣談者殆不  
必了人至乃山河影路萬古歷然未應悉成夢  
具曰旣云影跡何容歷然岸谷滄桑亦豈常醒  
之物耶第槩云如夢則醒復何存所知者知夢  
遊醒必非枕孔中所能辯耳

南柯夢記題詞

天下忽然而有唐有淮南郡槐之中忽然而有

文

六卷 六

國有南柯此何異天下之中有巍巍之中有王  
也李肇贊云貴極祿位權傾國都達人視此蟻  
聚何殊嗟夫人之視蟻細碎營營去不知所爲  
行不知所往意之皆爲居食事耳見其怒而酣  
鬪豈不呖然而笑曰何爲者耶天上有人焉其  
視下而笑也亦若是而已矣白舍人之詩曰蟻  
王乞食爲臣妾螺母偷蟲作子孫彼此假名非

本物其間何怨復何恩世人妄以眷屬富貴影  
像執爲吾想不知虛空中一大穴也倏來而去  
有何家之可到哉吾所微恨者田子華處士能  
文周弁能武一旦無病而死其骨肉必下爲螻  
蟻食無疑矣又從而役屬其冤氣以爲臣螻蟻  
之戚乃甚於虎狼此猶死者耳淳于固儼然人  
也靡然而就其徵假以肺腑之親藉其枝幹之

任昔人云夢未有乘車入鼠穴者此豈不然耶  
一往之情則爲所攝人處六道中嘖笑不可失  
也客曰人則情耳玄象何得爲彼示微此殆不  
然凡所書祲象不應人國者世儒卽疑之不知  
其亦爲諸蟲等國也蓋知因天立地非偶然者  
客曰所云情攝微見本傳語中不得有生天成  
佛之事予曰謂蟻不當上天耶經云天中有兩

足多足等蟲世傳活萬蟻可得及第何得喪多  
蟻生天而不作佛夢了爲覺情了爲佛境有廣  
狹力有強劣而已

紫釵記題詞

往余所遊謝九紫吳拾芝曾粵祥諸君度新詞  
與戲未成而是非蜂起詭言四方諸君子有危  
心畧取所草具詞梓之明無所與于時也記初



名紫簫實未成亦不意其行如是帥惟審云此  
案頭之書非臺上之曲也姜耀先云不若遂成  
之南都多暇更爲刪潤訖名紫釵中有紫玉釵  
也霍小玉能作有情痴黃衣客能作無名豪餘  
人微各有致第如李生者何足道哉曲成恨帥  
郎多病九紫粵祥各仕去耀先拾芝局爲諸生  
倅無能歌樂之者人生榮困生死何常爲驢苦

不足當奈何

溪上落花詩題詞

長孺僧孺兄弟似無着天親不綺語人也一夕  
作花溪諸詩百餘首刻燭而就予經時閉門致  
思不能如其綺也長孺故美容儀少年幾爲道  
人看煞妙於才情萬卷目數行下加以精心  
海藏世所云千偈瀾番者其無足異獨僧孺如

愚未嘗讀書忽忽狂走已而若有所會洛誦成  
河子墨成霧橫口橫筆無所畱難此獨未宜異  
也僧孺故拙於姿然非恨力不具者以學佛故  
早斷婚觸殆欲不知大壤間乃有婦人矣而諸  
詩長短中所爲形寫幽微更極其致如溪上落  
花詩芳心都欲盡微波更不通有艷都成錯無  
情乍可依不妨作道人語至如春日獨當爐卓

女盈盈亦酒家數錢未償半羞花僧孺下近爐  
頭何知羞態七寶避風臺翠纓裙帶愁牽斷鎖  
得斜風燕子來僧孺未親裙帶何知可以鎖燕  
燕姬墮馬一道香塵出馬頭金蓮銀蹙緊相鈎  
僧孺未曾秣馬何識香尖春闥怨乳燕春歸玳  
瑁梁無心顛倒繡鴛鴦僧孺未經摧繡安識倒  
鍼當是從聲聞中間緣覺中覺耶無亦定中慧

耳然予覽二音有私喜焉世云學佛人作綺語  
業當入無間獄如此喜二虞入地當在我先又  
云慧業文人應生天上則我生天亦在二虞之  
後矣

湯許二會元制義點閱題詞

人之愛子甚于愛其身度其身常智度其子常  
愚此其故何也予弱冠舉于鄉頗引先正錢正

之法自異其伍已輒流宕詞賦間所知多調予  
何不用法更一幸爲南宮首士最而好自潰敗  
爲予心感其言不能用也庚壬二年間制義不  
能盈十比杭守貳監利姜公竒方迫予明聖湖  
頭令作菰已近臘而逾春卒卒成一第去久乃  
悔之予力與機可爲王錢而遠之者亦非命也  
生長子蓮年孟舒早慧因以所常悔者望之取

國朝省會諸元作定爲正清側清之目示之兒  
遠曰何一以清耶予曰萬物惟清者貴元骨皆  
清十之三不能無側者耳此目隨遠亡去欲翼  
目之仲大耆曰元多時貴人或以側爲諱已之  
時季子開遠方學執求可爲法者予教之曰文  
字起伏離合斷接而已極其變自熟而自知之  
父不能得其子也雖然盡于法與機耳法若止

而機若行錢王遠矣因取湯許二公文字數百  
篇爲指畫以示湯公止中有行行而常止許公  
行中有止止而常行皆所爲正清者也不從橫  
氣來不從橫襲見得天高而人深故法聖而機  
神此予之所遷延流離而不能得者也而以教  
吾子此豈不謂之大恩也哉

庚戌

蕭伯玉制義題詞

文

六卷

十一



唐人有言不顛不狂其名不彰世奉其言以視  
士人文字苟有委棄繩墨縱心橫意力成一致  
之言者舉詔曰此其沸名已耳下者非其固有  
高者非其誠然予少病此語必若所云張旭之  
顛李白之狂亦謂不如此名不可猝成耶第曰  
怪怪奇奇不可時施是則然耳予所友吉州人  
士最篤長者義理淳深少者亦復風氣雄遠緩

急可爲世有故予每見吉州人士輒喜寔不同  
餘州人也九月聽榜南州纍纍然誦其名至泰  
和蕭君士瑋則啞然羣嘆曰此名士也予益爲  
之喜已乃知爲予邑南海葉侯所錄伯玉來謂  
謝而同陳大士夕予燕語冲然流蒞今昔目中  
久不見如許客也明日得其文字十數首大致  
奇發穎豎離衆獨絕繩墨之外粲然能有所言

非苟爲名而已大士曰方岳李公觀察葛公且  
爲伯玉刻此行之夫二公者士所証嚮聞人也  
而已爾則向所云不可時施者又不然矣夫不  
苟爲名而又可以時施此亦天下之至文也

芳草集題詞

辛丑夏五予坐廢交遊殆絕有客泠然數千里  
扣玉茗堂扉而去媒以芳草詩蓋吳下彭興祖

也急起攝衣冠而謝之舉其世則吳先賢彭孔  
嘉先生其祖云芳草詩晉江李宗謙爲序首引  
王長公布衣遊三人云俞仲蔚好里居而興祖  
喜遊謝茂秦俠盧次梗使酒與祖都無此意庶  
幾馴雅君子與興祖宴遊月餘恂謹殆甚間所  
嘗遊必爲堅護其所不足而按衍其所長於遊  
道中號爲長者每出其詩一過於宗謙瀟灑婉

舊之目可謂如其人如其人嗟夫 肅廟在御

天下豐樂 上好爲神仙清詞詞臣向用因風

隨流客都官者各厭所懷而去人士日以嬉遊

工文詞聲伎使氣彈射相高亦其時也屬者此

道殆絕文章家鉅人皆已前死而予亦坐廢空

竄蓼落之中見所爲彭先生孫者殆亦莊生所

云蹉然足音也予觀王長公謂彭先生豪於文

詞貌伏爽秀絕不挂人臧否沃之酒醉而益恂  
興祖之文情酒德乃自其祖以來莽莽榛柙固  
不足爲大雅道矣生且行還吳見馮元敏先生  
過廣平見大梁男子劉誠父其亦有同予落穆  
之悲乎芳草之詩曰何如薄世務又欲求知音  
殊有味乎其言之也偶爲題其卷之首

玉茗堂全集卷之六

終

文

六卷

十五

玉茗堂全集

臨川義仍湯顯祖著

記

江西按察司修正衙宇記

代作

臬司法度之所出納處也其公私堂舍中側高下晦明長廣皆必有中乎臬而後可以觀可以處是故易之蠱有事而賁有止也事固未有離

文

七卷

一

因革者因而莫可以革革而莫有以因則亦猶之乎因革而已惟夫因而必不可以無革革而幸可以無失其因則一不爲過勞而永可以幾逸法易以維新而衆可與樂成此其善物也江西臬司政事堂葢今上甲申歲吾師金存菴先生所重飭者板地起如雲緣是衙齋益以仰而下且故東偏也昨冬予代乏度之久曰失公宇



**卷之二** 而莫爲之興偏而莫爲之正得無非臬所  
宜乎先政者安之惟節之虞夫節取不傷財不  
頗民而已矣幸有以因予敢安而弗圖于是因  
其署而中之一棖無易也因其房而翼之益五  
木十之一因庠而高之三尺餘前後隙地障爲  
三各因而一之又因而屏焉級焉引以升無迫  
于堂也方隅之巽隆也因而閣焉銘之以東井

垣以內東西三十六丈南北二十二丈其方隅  
卽洿也因而截其三分之一爲水榭焉拓舊署之  
一鎮二楹而三耳且非徒如是而已也徒隸無  
所廢于官工稍無所料于民因于堂用之餘節  
縮而供之裁具而止在節中正以通不敢謂當  
位乎是殆所謂蠹而後事責而卽止者與夫然  
後堂與署靚乎其直而相望也益闕以明乎乎

其達而無仰也塏以清翼乎其崇而相將也嚴  
以盈可以出憲令可以時陰陽可以式燕而周  
謀可以退食而靜思然卽吾屬之罔不克臬也  
其永有躋于是乎是役也昉丁未臘六日落成  
戊申四月八日始終其勞者南昌周令君也予  
爲大書書其額及東并銘與楹庭并姓氏詳碑  
陰云

顧涇凡小辨軒記

凡天下從大而視小不精從小而視大不盡此夫以識爲大小者也居明不可以見暗在暗可以見明此夫以境爲辨塞者也惟道顯諸仁藏諸用其藏也復其顯也辨物無非用用無非仁逝而反賡而微非心之所爲也道也有然而舉九德之卦復若小焉耳言復者莫辨于大學之

道知止而後有定以能慮止者復也不復不止  
止而慮則其辨也天下而反之身心意遞相復  
也遞相小也而意復于知復于知則彌小耳乃  
又在乎格物物天下之物也格則其辨也心不  
在焉乃至視不見聽不聞食而不知其味不在  
者不復也不復雖食味聲色不可知而又奚辨  
焉學道者因至閉關之文爲主靜之說夫自然

之道靜知止則靜耳安所得靜而主之象曰商賈不行后不省方此非主靜之言也環天下之辨于物者莫若商賈之行與夫后之省方何也合其意識境界與天下之物遇而後辨夫遇而後辨固有所不及辨者若夫不行而行不省而省所謂自然之辨也與然則聖人何小乎復而大乎乾復之小乾之小也乾之大復之大也乾

大而明終始復小而辨于物其知一也聖人于  
顏氏子問仁告之曰克己復禮爲仁此亦顯仁  
藏用之說至視聽言動皆復而天下之能事畢  
矣故曰不遠復有不善未嘗不知吾友涇凡君  
懷顏氏之資幾學易之年有意乎是以名居稱  
名以小而取數予故廣其義以貽之具以諗于  
諸君子知復之所在者

蘄水朱康侯行義記

天下有意義之事非庸廢人所得與也何也庸  
廢人不足以受此名不足以食此報蓋必存乎  
其人雖然以爲名而張之報而收之則亦庸廢  
人之事非有人其中也人之大致惟俠與儒而  
人生大患莫急于有生而無食尤莫急于有士  
才而蒙世難庸廢人視之曰此皆無與吾事也



天下皆若人之見則人盡可以餓死而我獨飽  
天下才士皆可辱可殺而我獨頑然以生推類  
以盡天下寧復有兄弟宗黨朋友相拯絕寄妻  
子之事耶此俠者之所不欲聞而亦非儒者之  
所欲見也以予所聞亡友河內太守蘄朱子得  
之弟康侯有足記者其從兄子貞破千金之產  
豪浪結客產盡去而爲漁大澤中不得魚殊泣

自傷康侯曰如此天下聞之必以俠爲悔歲與之田百斛曰吾非爲子貞八口者也初子得病且劇自度不可起割田其宗人爲公私費康侯益爲廣之得四百斛曰先岳伯太守之遺也施予必稱父兄可謂儒者其最著在急難友人姜夔一事夔黃岡諸生與王子聲一鳴康侯等爲十二友子聲嘗爲我語夔於長安以爲才坐遊

大吏貴人所口語捕逮急對子聲已前死莫爲  
言夔跳身亡去北至代所在十年矣獨其母老  
人與婦居丁零訟係至求死不可得康侯常居  
間存活之又時時上書理夔後稍有哀夔者得  
白夔乃出曰我不可復爲郡縣諸生矣取貲所  
遊而遊太學以交于賢豪長者公卿間豁吾意  
康侯曰子行而嫂饑奈何吾有田數十畝近齊

昌歲可粟六百斛他豪臬物稱是以給嫂幸無  
內顧憂夢曰可矣起別去擇日治文書行此所  
爲康侯之義也或曰異日夢必有以報康侯非  
也康侯何以必知異日耶或又曰康侯爲人故  
拓落自喜一時聞人如郭美命瞿睿夫焦弱侯  
皆相慕豔爲之記以傳康侯微亦有名之意耶  
予觀康侯非泄泄爲名者天下凡有意義之事

常力不能致而心喜之口道之喜極而致固人情也如予於康侯未有聞也而獨聞之偶愚偶愚曰非惟如是而已康侯固留意內學者文字之外別有所窺若此者亦非予所知也獨怪江楚之間不少學者江多儒俠而楚多俠儒以所聞見其於兄弟宗黨友朋之急好以其身與焉而不出於庸庶人之見者亦幾何人也彼誠無

所窺者耶康侯祖江居黃能世其家學必有出  
文字之外者姑記其行義以風云

宣城令姜公去思記

余識宣城令荆人姜君奇方孝廉時長者後余  
遊宣行水陽林樹修遠厨傳甚飭已又見其人  
士沈君典梅禹金之流文雅風快爲之欣然令  
數來攸攸如也令朝京師會余上試令故江陵

相弟子師也不數日江陵弟子介令候余余謝  
不敢當意令且計晁寵遴之矣然令終用平徙  
得治栗郎已復貶山東小州屬監太山妃祠余  
異之蓋去宣十年丞武林而病疽宣人聞之愁  
然趨比已宣人聞之脫然喜余又異焉夫姜君  
者亦蹇罟重進止質行人耳治縣當亦無有奇  
何以思乎一日宣父老諸生來言狀如之且曰

令無以予民然善爲條如前役者長常署人田  
多者得收其旁戶租常自入豪蕩比前徵後相  
補射爲謬卒發覺一人至負租百萬犯至死當  
戍邊者至一家九人連年不決遣令至乃與囚  
約能輒抵所負爲除不能遣未盡十日囚空更  
爲法行條編均里甲里自徵輸因以訖稅如程  
至無可答故事吏贖常利金得自與間行其十



之二游聲不在民矣緩急無所句令曰若此所  
謂金生而粟死者也歲當侵奈何乃大治諸庾  
累穀至七萬餘石主以警良人然令在縣六年  
無凶災後乃遭歲水敗穀種流死然後以此不  
饑嗟夫作令如此亦可思矣余嘆曰然則何以  
遷無殊則諸生矍然造前曰沈君典在時言之  
矣雖江陵相亦極知姜令賢然嘗謂其子令不

與我親常衆見我後江陵相橫不肯持父喪問  
荆人士在都者當云我何聞獨姜有後言因以  
伎去且夫仕宦遇合者時也惠音者基也其時  
在上其基在下然則何以去十年而後思中一  
父老般仙飲洩而前曰始令之勤吾宜也食稗  
衣蕉亡晝夜忽忽勉循其民間勞疾皆興立纖  
致口咄咄不能言常心計而手條之乃至顏色

黎露耳目將廢一時流吏姍笑爲愚然至今號  
令有所利便民者常君之法也乃今而後知之  
余不覺流聲歎曰若宣之民可謂能言其君矣  
百姓何負於長吏哉書之告後來者

青蓮閣記

李青蓮居士爲謫仙人金粟如來後身良是海  
風吹不斷江月照還空心神如在按其本未窺

峨嵋張洞庭卧潯陽醉青山孤縱曉映止此長  
江一帶耳風流遂遠八百年而後乃始有廣陵  
李季宣焉季宣之尊人樂翁先生有道之士也  
處詔而神清休然穆然五經師其講授六德宗  
其儀表達人有後爰發其詳夢若有持清都廣  
樂徘徊江庭以祝將之曰以爲汝子覺而生季  
宣因以名生有奇質就傳之齡騷雅千篇殆欲

上口弱冠能爲文章雲霞風霆藻神逸氣遂拜  
賢書名在河岳公車數上尊人惜之曰古昔聞  
人雅好鳴琴之理子無意乎季宜奉命筮仕授  
山以東濟陽長資事父以事君亦資事君而事  
父也三年大著良聲雅歌徒咏然而雄心未弇  
俠氣猶厲處世同於海鳥在俗驚其神駿遂乃  
風期爲賈患之媒文字祗招殘之檄矣君慨然

出神武門登太山吳觀而嘯曰使吾一飲楊子  
中冷水亦何必三周華不注耶且親在終致吾  
臣而爲子矣則歸而從太公羣從騷牢夷猶乎  
江臯眺聽壺觴言世外之事類如也起而視其  
處有最勝焉江南諸山翠微浥曄几席欣言久  
之夷堂發爨層樓其上望遠可以賦詩居清可  
以讀書書非仙釋通隱麗娟之言言所不取然

季宣爲人偉朗橫絕喜賓客而蕪城真州故天下之軸也四方遊人車蓋帆影無絕通江不見季宣卽色沮而神懊以是季宣日與天下遊士通從相與浮柏跳踉淋漓頓挫以極其致時時挾金焦而臨北固爲褰裳蹈海之談故常與遊者莫不貽睥相視嘆曰季宣殆青蓮後身也相與顏其閣曰青蓮季宣嘆曰未敢然也吾有友

江以西清遠道人試嘗問之道人聞而嘻曰有  
是哉古今人不相及亦其時耳世有有情之天  
下有有法之天下唐人受陳隋風流君臣遊幸  
率以才情自勝則可以共浴華清從階升娛廣  
寒令白也生今之世滔蕩零落尚不能得一中  
縣而治彼誠遇有情之天下也今天下大致滅  
才情而尊吏法故季宣低眉而在此假生白時



其才氣凌厲一世倒騎驢就巾拭面豈足道哉  
海風江月千古如斯吾以爲青蓮閣記

新建汀州府儒學記

代李太守作

汀爲漢南部地水爲丁厥象文明唐開元間發  
福撫二州奧隙之地爲州而予撫人也於汀接  
建武而來固習其山川風氣矣郡學故宋紹興  
間守鄭公移置中爲聖殿其後爲明倫堂至開

文

慶初守胡公移殿於宮西而堂其東北不稱所以尊嚴先師之意國朝以來時修時圯以至于今倅未有易其位置而新之者亦其時也今上歲丙午予以比部郎積歲來守是拜三日謁廟起立周矚庭廡多第湯弗治愾焉久之問其星土則自予省章貢石城而來競誕陸離興爲九龍支于橫岡學在其東雲驤飛來拜相其

中七井休光與斗河通宜其文章蔚縟以洪而  
人文地氣猶若有待而充者其士之未振興其  
地之弗飭與退而謀之同案曰文翁在蜀而禮  
殿興僖公居魯而泮宮作及今不理誰執其咎  
度費而言之大吏報可詎辰鳩工伐堅以梁陶  
膏以甃頽舉敝易滂漉以色最後因諸生之請  
也而復明倫堂於殿之北以迨櫺墻廊阿齋廬

庖湍靡敢不虔以飾蓋若干時而告成然後士  
之入其門見崇垣修廡翼翼其相引也升其殿  
堂見丹青黼黻煌煌其相秩也入其室見俎豆  
絃籥詩書翕翕其有以相置也固皆鼓舞焉迴  
翔焉若臻皇宋之舊規而相與歡樂之矣乃諸  
生復求予言所以學而因爲記予三讓不敏而  
乃晉學官諸生于庭曰嗟夫士知所以學乎三

代養士皆有法周衰法壞而宋爲近之仁義道德上下所以相成其法一出于是故宋之君子醇正詳雅履規蹈繩平居則相與談詩書談禮樂以觀先王之風存聖人之澤至於遠流離從容就之而無激無怠是非上有以宿養下有以自得而能耶我國家建學立師養士之法繼三代而軼宋近所爲修功令厲學官者尤至濃

純也雖深谷斗絕被化滋久醇茂日蒸况其前  
列餘風去宋未遠楊子直親受建安延平之學  
而龜山豫章之裔在吾宇焉至于李伯紀文信  
國致命來茲此數君子者于道德仁義曄奕貞  
固何如也無非汀士父老子弟所習言者耶由  
數君子所爲學者積焉而趨于大成則國朝  
所以養士之意具在若夫山之拜相水之文明

會其時而多士以興猶未足以塞太守厚望諸  
生作新學之意也於是學官諸生殷殷焉聞問  
焉有概于予言也而麗之學門以爲記

南昌學田記

古有井田學校出于一各有以養其民以登于  
學誦數而歌舞之潛裕斂給以一其情于仁義  
禮樂之具而恣之成以仕其鄉閭有塾則鄉老

爲之師民朝于田而暮于學也魯作泮宮鄭不  
毀鄉校有司于此獻囚辟之成士於此議鄉大  
夫之政其於上下之際亦重矣而未有經理其  
田係之以學者蓋所謂養民以及賢食而教之  
峻而發之故出于一而無肥瘠之憂也至于先  
師禴莫覲服鍾簋籩踐之物歲時謹而修之又  
無所事于田也秦不師古阡陌開而庠序塞漢



興不能起而一之馴至有宋慶曆開始詔天下  
郡縣皆立學而其後何司乃始嚮學徃徃飾其  
器于禮樂而講其財於仁義以是爲政之情耳  
蓋我國家後學徧天下分之以餽而合之以  
饌其德於士也亦旣飽矣然而文化廣羨弟子  
員之來歲有增益如余所覩南昌生儒乃至七  
百餘人歲時有課命也而無有以食之其情不

可以久至於貧而以告者固無以應也春秋釋  
菜所受胙滋益多乃至假市牲而獻余受事祠  
下考文章而憮然于軒楹間有日矣計安所得  
田而爲制乎益且今令君寧國黃詹爲政且亦  
稔于茲而始得所爲俸幣之餘若干者爲易城  
南田若干石而廩于學宮之東焉歲以石十五  
爲牲而其餘以課士士有行而貧無以存者以

一二石與之其出入學請于縣以行而報于學  
使者蓋以今爲端而以來茲爲繼士庶乎其不  
窮于學也已雖然以爲具而止乎吾將以田語  
于學植者閭所爲儲田皆上腴也而近于官非  
遠也然而田之不以其人且稗且廢得無廢矣  
而主者視之不謹數猶莫得而知也數具矣而  
出之不禱不以食勤士振介潔而糜之乎他猶

非余易田意也予觀諸士中多從余也恢奇秀  
好之資比比而是且日近官廡而遊師帥紳冕  
之間此亦由之美而近者矣然不以美學不以  
學至于道能無裨且廢乎如此田雖美不知其  
美也以美而學且于道不日月比其成多少淺  
深之數亦莫能明也比其成矣而要之適于用  
不爲吾先師而用猶不以田祀也不爲吾同道

者而用猶不以田課士。惡有行者也。若然者。無亦非吾養士意。即是故。聖王治天下之情。以爲田禮爲之。耜而義爲之。種。然非講學亦無以耨也。于是乎。獲而合之。仁安之樂。至于食之肥而天下大順。嗟夫。天下之於一邑也。一而已矣。侯將有大于斯者。姑爲取于養賢及民者而申之。勸云。

臨川縣新置學田記

臨川學宮自城南而遷故寶應浮圖地也與廣壽寺並衢而南學宮乃寡田以養其學官弟子而廣壽之田至若干頃中頗侈削去十一二前袁侯復之予爲記其事若曰田之設以成道資而覺世也道非世俗忙人所能得庶幾禪律之士有一聞其大道外生死者焉蓋其聞而修以

惟也已而主其田者瀾漫耗蠹不以給四方禪  
律法喜之食而四方之以禪律至者亦皆鈍劣  
朽憊不稱威儀應食之義寺虛有其田而田亦  
虛有其寺固未閒者之不忙而於弘廣甚深微  
妙之際終莫能有所明也我劉侯撫其冊而悲  
之曰敝敝者而何以多曰爲法王以衆生爲田  
吾聖王亦以人情爲田禪以禪悅食儒以儒悅

食裁彼賦此亦天下之通義也遂取其若干畝  
與郡校而入若干畝與縣學官爲經紀學官博  
士諸弟子禮際振絕歲費出入皆有程於是諸  
博士先生弟子忻忻焉言言焉稽首而贊曰侯  
之惠也而仍以侯之旨屬記于予予因就博士  
先生而驗之曰侯蓋惠而已耶其以爲教也吾  
有質于此則必以受斯田而食焉者爲閒者乎



忙者乎王子藝問士士何事豈非以士爲閒者  
與孟子曰尚志仁義而已殺一無罪非仁而取  
非其有非義凡世俗之所爲粹不可得而閒者  
要非必於仁義之事也誠能去其非而是之志  
則其閒殆甚固然之廣居居之而已成然之大  
路由之而已如此而大人之事已備士復何事  
之有哉士固天下之閒者也博士先生盱衡而

燕坐諸生儼雅而遊翔上無公方期會之侵下  
無井里竭蹶之咎舞蹈太平之世咏歌先王之  
風當此之時其亦有不閒者乎吾道廣矣大矣  
能無弘願深矣微矣能無妙思慮其慮何以近  
聖人之居食其食何以事聖人之事有聞焉而  
加修惟也乎仁以耕義以種至干安之樂食之  
肥而後侯之教有獲於無窮不然餼餐已具猶

彼之裁而此之賦也吾黨相與爲惠而已耶先生覺然避席而興曰是侯旨也而亦士之志也砥予言而籍若田于左

續天妃田記

高皇帝卽位二年勅太常司博士孫子初定儀封號天妃歲以正月十五日三月念三日鄉祀文皇帝卽位遣使者高品鄭和等遍海外國

文

欲有所聞妃著神海上天子親記其事歌呼之  
祀龍江之上置守者尸羽人而和等復以金銀  
諸飾物爲妃報焉 今上九年卿陸公以和所  
獻貯銀三百兩買高橋門外田畝百歲入銀一  
十八兩爲禱祠時有所修治費後五年予率太  
常官屬視後堂又見和所畱金銀步搖花樹卮  
匱合注之屬艷焉冠上花鳳流蘇玲瓏多斷落

不可檢綴念妃者天之貴人氣物之內惟虛生  
神海者地之積虛處也故曰天牝國以爲妃若  
以坤爲媪金爲母傳者遂曰斗中有玉女焉光  
響欽曄因而像之爲作環飾此今時王妃非天  
妃也然聞之神無求于人而善悲人悲心不除  
所以止爲神也今廟下王者日夜供養靈帳飾  
除炳芳執燭所以歌雩祝塞甚恭歲常百人而

前時所藏追鉅諸飾物又非妃所御竊以人道  
事妃當亦有所悲也乃藏其諸黃金諸物而銷  
其白金爲兩者得二百二十六焉以續高橋門  
外田二頃二十畝歲屬銀三十九兩六錢歲給  
羽人廟者布花三兩樂舞生道士人三錢廟戶  
七人人二錢二祭爲主祭者飯三兩六錢餘以  
待所欲治或益置田廣妃之悲施焉記曰所其

後

遂昌縣滅虎祠記

癸巳冬十月虎從東北來甚張忽夢指有二碑  
迹登堂有言虎嚙其鄉西牧蹉子予嘆曰予德  
不純氣之不淑耶予刑不清威之不震耶何以  
然氣如是下令將以十月望吉告城隍之神文  
曰吾與神共典斯土人之食人者吾能定之而

文

不能於止虎民曰有神夫虎亦天生貴不如人  
神無縱虎吾將殺之呼吾民任兵者簡其銳以  
從搜之葉塢是夜見有一冠幘袍靴白鬚圓頤  
長者見夢若予與同爲法官治獄者持一文書  
示予予曰必殺此二渠以償長者微笑指文書  
中一處示予若前所云虎亦天生之句意望予  
寬之予正色爭不可長者知不能奪復微笑曰



徐之觀樞密公意何如耳予覺知神有意乎然  
然者然已戒不可止之葉塢午至昏見虎虎奔  
一虎倨高嶠薄不可近予曰知之矣旬餘齋居  
夜念樞密公兵象也有得虎者與當祠之是夜  
不能寐覺外洶洶有聲問之獲巨虎雄也虎管  
廣尺餘長幾二尺身七尺驚其雌三日遶而號  
其山中伏矢悉死松陽界中東北抵萬山忽夜

震如裂民曉視之得巨虎晉二八股草血洙濱  
縣人懼異甚然以公出郡中月餘歸忘立祠也  
復報有虎予嘆曰神其罪予老氏曰佳兵不祥  
莫如以慈衛之遂就報願佛寺旁大樹下祠爲  
滅虎祠祠樞密公非真能滅虎也虎滅無迹則  
亦滅之乎爾祠以後獲虎三五向後虎聞遂稀  
神之能有茲祠也爲之銘銘曰惟山之嶮有貓

有虎神其司之甚力而武神來見夢予爲立廟  
以衛吾人依於大慈遂伐三彪薦五文皮孰一辰  
於幽徵其腦髀丁壯出作翁孺倫嬉非我德民  
神滅其菑菑由人興非虎非豺我去其苛物象  
而和神其安之與民休嘉

遂昌縣相圖射堂記

蓋今上二十有一年三月望後三日予來遂昌

文

七卷 二五

又三日謁先聖廟甚新從學官諸生講堂堂敞  
其後益庫問所藏書無有問縣隅中或有他學  
舍爲諸生講誦無有也四月朔始克視事發檄  
有學使者陳公所爲書命諸生射諸生皆對不  
能云無射堂也按縣治南石梁綠溪而迤有斷  
垣負牛山故令鍾嘗爲若堂者令廢而其旁壽  
光僊人有宮壩燕甚衍可以相益諸生言如此

爲之欣然望吉乃授地形於學官於君可成周  
君思問黃君繼先且以報學使君且營射堂矣  
請以學租三千錢爲端而予爲縣官於祿入固  
無所受凡訟之獻金矢而不直者賦其材或以  
輸作會夏五月大雨水諸山之材畢來工作咸  
集六月堂成迫東陂埴而蒼其西山有峯遡澗  
而遙門其空夕陽也門之中引泉爲池池之上

除道甚脩凡百數十步而垂堂可以馳步射也  
道左右各廣丈餘而霽若繩爲學舍者各十五  
屬之門其舍修容二人合之可坐生徒六十人  
間間如也繚以垣六月芸七月穫作者若休八  
月而後克成費百金其右旁武射場也射率歲  
閱兵壯兩肄餘月課捕盜賊射虎尚不中程何  
以令士射夫士射亦禮射而可耳六藝射於禮

樂爲近天子之選士祭必射於澤宮卿大夫士  
歌采蘋采蘋言士有幽微而可采也予所以爲  
池將歌蘋蘩而薦士焉非射而已也男子始生  
爲鬲弓矢以射天地四方必先有志於其事勉  
所以不愧爲男子者噫豈惟射哉

臨川縣古永安寺復寺田記

天下有閒人則有閒地有忙地則有忙人緣境

起情因情作境神聖以此在因引化不可得而  
遺也何謂忙人爭名者於朝爭利者於市此皆  
天下之忙人也卽有忙地焉以苦之何謂閒人  
知樂樂山仁者樂水此皆天下之閒人也卽有  
閒地焉而甘之甘苦二者誠不知於道何如然  
而起則遠矣朝市之積則有田廬山水之餘則  
爲寺觀故寺觀者忙人之所不留而田廬者閒



人之所不奪也臨川古爲名郡五峰三市在焉  
三市者市也五峰之間聞有觀九寺十三蓋入  
明以來大爲忙人割奪盡乃至稗粥無所而古  
永安寺境界歸然獨完其田則大半無有矣邑  
侯袁公起於蘄黃來宰於茲廣山川之精深性  
相之學披圖而嘆曰臨川人之憎閒人也一至  
此乎有能從吾言而反其田者吾徒也於是郡

弟子劉某嘗籍所買田若干畝上之侯以歸於  
寺侯爲欣然告世尊而撫之曰此所謂孝子劉  
某也而適是時有僧大千購得南都藏經以至  
而尊置之寺侯曰有其書矣而無其人何於是  
有浮梁僧水月爲達觀先生弟子精心苦行通  
於評唱之義適來寓斯人士與遊始知有所謂  
宗門者久之長干寺僧大初來講蓮華經聽者

千餘人得田而食無不懽喜贊嘆曰此固我侯  
之福田也嗟夫富忙人之急得此田也豈不曰  
彼無父母妻子之屬先王所禁遊民者吾非真  
有所憎利其田姑以蕃其種類云耳嗟夫此所  
謂奪閒人之物以將養忙人也固一其說然試  
以語彼使天下皆忙人而無一閒人皆忙地而  
無一閒地則亦豈成其爲世相也哉且今所從

文

遊於二氏者彼亦有所業非所禁遊民也如其  
爲遊民法固禁之久矣所惜者遊人之非遊而  
閒人之未嘗閒也非閒非遊不可以涉道是故  
聚百閒人而食之必將有意乎道者焉聚千閒  
人而食之必將有進乎道者焉不已而食閒人  
至於萬猶將有得道者焉道之喪世也久矣幸  
而有一人焉其何禁於千萬人之閒而奪其養

哉卽未有之庶幾有之如以食百千萬人之聞  
者導以養百千萬忙人其必無冀於有道者矣  
則亦蕃其種類而已然則侯所爲存寺者或不  
在田而在道飯器無殊香色有異後之遊閒逞  
來食於茲田者其亦有感於侯之弘願云

宜黃縣戲神清源師廟記

人生而有情思歡怒愁感於幽微流乎嘯歌形

諸動搖或一逞而盡或積日而不能自休蓋自  
鳳凰鳥獸以至巴渝夷鬼無不能舞能歌以靈  
機自相轉活而况吾人奇哉清源師演古先神  
聖人能千唱之節而爲此道初止爨弄參鷗後  
稍爲末泥三姑旦等襍劇傳奇長者折至半百  
短者折才四耳生天生地生鬼生神極人物之  
萬途攢古今之千變一勾欄之上幾色目之中

無不紆徐煥眩頓挫徘徊恍然如見千秋之人  
發夢中之事使天下之人無故而喜無故而悲  
或語或嘿或鼓或疲或端冕而聽或側弁而哈  
或闐觀而咲或市湧而排乃至貴倨弛傲貧嗇  
爭施瞽者欲玩聾者欲聽啞者欲嘆跛者欲起  
無情者可使有情無聲者可使有聲寂可使誼  
誼可使寂饑可使飽醉可使醒行可以畱卧可

以興鄙者欲艷頑者欲靈可以合君臣之節可  
以浹父子之恩可以增長幼之睦可以動夫婦  
之歡可以發賓友之儀可以釋怨毒之結可以  
已愁憤之疾可以渾庸鄙之好然則斯道也孝  
子以事其親敬長而娛歿仁人以此奉其尊享  
帝而事鬼老者以此終少者以此長外戶可以  
不閉嗜欲可以少營人有此聲家有此道疫癘



不作天下和平豈非以人情之大寶爲名教之  
至樂也哉予聞清源西川灌口神也爲人美好  
以遊戲而得道流此教於人間訖無祠子弟開  
呵時一醪之唱囉哩噠而已予每爲恨諸生誦  
法孔子所在有祠佛老氏弟子各有其祠清源  
師號爲得道弟子盈天下不減二氏而無祠者  
豈非非樂之徒以其道爲戲相詬病耶此道有

南北南則崑山之次爲海鹽吳浙音也其體局  
靜好以拍爲之節江以西弋陽其節以鼓其調  
誼至嘉靖而弋陽之調絕變爲樂平爲徽青陽  
我宜黃譚大司馬綸聞而惡之自喜得治兵於  
浙以浙人歸教其鄉子弟能爲海鹽聲大司馬  
死二十餘年矣食其技者殆千餘人聚而諗於  
予曰吾屬以此養老長幼長世而清源祖師無

祠不可予問倘以大司馬從祀乎曰不敢止以  
田竇二將軍配食也予額之而進諸弟子語之  
曰汝知所以爲清源祖師之道乎一汝神端而  
虛擇良師妙侶博解其詞而通領其意動則觀  
天地人鬼世器之變靜則思之絕父母骨肉之  
累忘寢與食少者守精魂以修容長者食活淡  
以修聲爲且者常自作女想爲男者常欲如其

人其奏之也抗之入青雲抑之如絕絲圓好如  
珠環不竭如清泉微妙之極乃至有聞而無聲  
目擊而道存使舞蹈者不知情之所自來賓嘆  
者不知神之所自止若觀幻人者之欲殺偃師  
而奏咸池者之無怠也若然者乃可爲清源祖  
師之弟子進於道矣諸生且其勉之無令大司  
馬長嘆於夜臺曰奈何我死而此道絕也廼爲

序之以記

文

七卷

三十六